

娛書堂詩話卷第一

趙與覩 威伯集

唐許渾題孫處士居云高歌懷地肺遠賦憶
天台極為的對真誥云金陵者洞虛之膏
腴勾曲之地肺注云其地肥故曰膏腴水
至則浮故曰地肺

古樂府云愛惜如窮袴防閑托守宮冷齋夜
話云窮袴漢時語今襠袴也然未詳所出
按西漢上官后傳宮人使令皆為窮袴多

其帶服虔曰窮袴有前後襠不得交通也
師古曰即今之緄襠袴也

蘇才翁舜元仕至轉運使皇祐辛卯按部至
海昌安國寺藏院留一詩于壁曰畫堂三
月初三日絮撲紗窓燕拂簷蓮子數杯嘗
冷酒柘枝一曲試春衫階臨池面勝看鏡
屋映花叢當下簾誰倚南樓指新月玉鈞
素手兩纖纖書法遒勁有懷素體今刻于

石

冷齋夜話稱文與可詩精絕如詠鷺鷥云頸
細銀鈎淺曲脚長綠玉深高岸上水禽無
數有誰似爾風標予閱與可詩復有云避
雨竹間點點迎風柳下翩翩靜依寒蓼如
畫獨立晴沙可憐尤清援可喜

虞翻傳翻放棄南方自恨淪沒每謂生無可
樂死以青蠅為弔客故靈徹謫汀州詩云
青蠅為弔客黃耳寄家書

黃垂夫庶恠石絕句云山鬼水恠著薜荔天

祿辟邪眠莓苔鈎簾坐對心語口曾見漢
唐池館來天祿辟邪獸名漢西域傳烏弋
有桃杌孟康曰似鹿長尾一角者或為天
祿兩角者或為辟邪

李西臺直宿早朝二詩其一云春風夜急銅
龍漏淡月斜侵金井欄已覺花枝零露重
宿鶯猶睡怯餘寒其二云着衣香重海棠
風人在瀛洲御苑東將對赤墀班未定井
欄樓角日先紅呂居仁跋云觀西臺詩想

見國初太平氣象不遠餘風遺烈足以疎
動後世恥想貞觀初難與數子偕吾於諸
公亦云

山谷自黔中還荆南見一女子奇美因賦水
仙花以寓意山谷下世女子貧不能給其
夫鬻於田氏一日召高子勉飲妾出侑觴
子勉請以詩中國香字名之因作長篇紀
其事有云却把水仙花說似猛省西家黃
學士乃能知妾妾當時悔不書空作黃字

婢來曰胡為乎泥中答曰薄言往愬逢彼
之怒撻言蕭穎士有僕事之數十年穎士
捶楚嚴慘人或激之擇主僕曰我非不能
特愛其才耳

東坡謂晨飲為澆書李黃門謂午睡為攤飯
陸務觀嘗有絕句云澆書滿挹浮蛆甕攤
飯橫眠夢蝶床莫笑山翁見機晚也勝朝
市一生忙

鷓鴣其聲格磔可聽世俗想像其音或云懊

惱澤家或云行不得哥哥蓋方言不同而
歌詠亦異為用韋莊詠鷓鴣詩云南禽無
侶似相依錦翅雙雙傍馬飛孤竹廟前啼
暮雨汨羅祠畔弔殘暉秦人只解歌為曲
越女空能畫作衣懊惱澤家非有恨年年
長憶鳳城歸山谷詠李居士馴鷓鴣云真
人夢出大槐宮萬里蒼梧一洗空終日憂
元行不得鷓鴣應是庫亭公常用前語黃
用後語

羅隱嚴陵灘詩范文正公釣臺詩俱押高字
范詩特高妙至用雲臺事尤非隱所及羅
云中都九鼎勒英髦漁釣羊裘且遁逃世
祖昇遐夫子死原陵不及釣臺高范云漢
包六合網英豪一箇鴻冥惜羽毛世祖功
臣三十六雲臺爭似釣臺高

魯叅預從龍赴省時館於衢之順溪題一絕
云紅照西沉暫解鞍偶然假館豈求安新
豐獨酌誰為侶坐對窓前竹一竿識者已

韙之矣是年竟至大魁致身政府至今其
館扁為狀元館

四明高端叔博學能詩鄉里所推重嘗有靈
詩一聯云洒窓蠶食葉入竹蠅行沙人稱
其工又有聯云人間桂子月中種水底梅
花堤上枝竟高隱不仕妻攻媿挽之云弟
子皆藍綬先生竟白袍

毛國英澤民之從子也以詩自鳴嘗經岳侯
駐兵之地江禁方嚴國英投詩云鐵鎖沉

沉截碧江風旗獵獵駐危檣禹門縱使高
千尺放過蛟龍也不妨侯曰詩人也委舟
以渡之

僧志南能詩宋文公嘗跋其卷云南詩清麗
有餘格力閑暇無蔬筍氣如云沾衣欲濕
杏花雨吹面不寒楊柳風余甚愛之

唐制有寬者哭昭陵下故李涪策夜簾獻詩
云公道此時如不得昭陵痛哭一生休陸
務觀亦有句云積憤有時歌易水孤忠無

路哭昭陵

唐羅隱繡花詩云花隨玉指添春色鳥逐金
針長羽毛趙彥若剪綵花詩云花隨紅意
發葉就綠情新鑄意俱奇皆警句也

白樂天獻裴晉公詩云聞說風情筋力在只
如初破蔡州時王禹玉上文潞公詩云功
業特高嘉祐末精神如破具州時隱括樂
天語也

胡忠簡公以言事忤秦檜謫嶺外士大夫畏

罪莫敢與談獨王盧溪珪詩以送之其一
云囊封初上九重閔是日清都虎豹閑百
辟動容觀奏牘幾人回首愧朝班各高北
斗星辰上身墮南州瘴海間豈待他年公
議出漢廷行召賈生還其二云大厦元非
一木支欲將獨力住傾危癡兒不了公家
事男子要為天下奇當日姦諛皆望落平
生忠義只心知端能飽喫惠州飯在處江
山足護持為邑人歐陽識告訐竄辰州檜

死而還

唐任濤高安人詩名早著有露園沙鶴起人
卧釣船流之句李常侍隲度察江西特與
放里役

胡文恭公子宗炎善為詩有句云飛禽避軒
蓋殘果落莓苔歐陽公賞之

周希稷承勛有詩名嘗為瑞之新昌尉題度
門院詩云才入度門寺先觀覺範詩昔人
吟不盡今日到方知地僻寒來早山高月

上逢池邊老脩竹曾映董生帷蓋翼龍圖
端書堂在焉宿玉隆宮云夜熱熱松明火朝
焚栢子香舉家來萬壽佳節遇重陽雨止
雲穿日風高天欲霜吾廬籬下菊應恠未

還鄉

舊傳一貧士死見陰吏為言當再生汝有三
百甕甕綠未盡陸放翁病愈絕句云鏡中
無復舊朱顏一笑衰翁乃爾頑三百甕甕
消未盡不知更著幾年還戲用此事

昔有沙門遊永嘉鴈蕩欲賦未就遇一負薪
老人倚杖而嘆問曰何為對曰一生看不
足遂得句云四海名山曾在目就中此境
難圖錄出前撞見白頭翁自道一生看不
足

洪川大智禪寺百丈山高可十尺為大叢林
唐宣宗嘗以詩題云大雄真跡枕危巒巒
梵宇層樓峻萬般日月每從肩上過山河長
在掌中看仙峰不問三春秀靈境何時六

月寒更有上方人罕到暮鐘朝磬碧雲端
不獨為此山絕唱帝王意度於此可見

揚誠齋序千巖摘藁云余嘗論近世之詩人
若范石湖之清新尤梁溪之平淡陸放翁
之敷腴蕭千巖之工致皆余之所畏者姜
白石詩藁自序云尤延之先生為予言近
世士人喜宗江西溫潤有如范至能者乎
痛快有如楊廷秀者乎高古如蕭東夫俊
逸如陸務觀是皆自出機杼皆有可觀者

又奚以江西為哉觀二公推許想見當時
騷雅之盛建安大曆風斯在下矣

王武臣度豫章新英人吟詩有警句如雲生
坐來石風掩讀殘書元紅賒晚景漲綠上
平沙鴉分供餘食鴿亂着殘棋樵斧和雲
斫漁蓑帶雪披皆清竒可誦張紫微謝良
齋極稱賞之

康伯可與之紹興間過清江遊慧力寺題二
詩于松風亭其一云天涯芳草盡綠路傍

柳絮爭飛啼鳥一聲春晚落花滿地人歸
其二云江上濃陰曉未開瘦筇支我上蒼
苔春寒前日去已盡今日又從何處來

王荆公初夏絕句云石梁茅屋有彎碕流水
澌澌度兩陂晴日暖風生麥氣綠陰幽草
勝花時范石湖云嘗蒙恩獨引賜燕

壽皇與行苑中親誦後二句以為佳製

姜堯章夔居苕溪與白石洞天為隣潘轉菴
字之曰白石道人且畀以詩曰人間官爵

似樗蒲木到枯松亦丈夫白石道人新拜
號斷無繳駁任稱呼堯章賡以長句其詞
云南山仙人何所食夜夜山中煮白石世
人喚作白石仙一生費齒不費錢仙人食
罷腹便便七十二峰生肺肝真租只在南
山南我欲從之不憚遠無方煮石何由軟
佳名錫我何敢辭但愁自此長苦飢囊中
只有轉菴詩便當掬水三咽之

李莊簡公光為詩清絕可愛越州雙鴈道中

一絕云晚潮落盡水涓涓柳老秧齊過禁
烟十里人家雞犬靜竹扉斜掩護蠶眠後
在政府與秦檜議論不合為中司所擊送
藤州安置差密院使臣伴送公戲贈之云
日日孤村對落暉瘴烟深處忍分離追攀
重見蔡明遠贖罪難逢郭子儀南渡每憂
鷺共墮北轅應許鴈相隨馬蹄慣踏閑山
路他日重來又送誰亦微婉而有深意

韓子蒼題淵明採菊詩云九日東籬採落英

白衣遙見眼能明向令自有杯中物一段
風流可得成曾文清公訪戴圖詩云小艇
相從本不期剡中雪月並明時不因興盡
回船去那得山陰一段奇兩詩意同俱為
佳作

曾文清公謝路憲送蟹詩云從來嘆賞內黃
侯風味尊前第一流只合蹢躅赴湯鼎不
須辛苦上糟丘內黃侯三字甚新

梅聖俞因劉原甫戲言之識竟終於都官葬

在宣城俗呼為梅夫子墓吊之者有句云
贏得兒童叫夫子可憐名位只都官

娛書堂詩話卷第一

國家圖書館, NATIONAL CENTRAL LIBRARY, TAIWAN, R.O.C.



娛書堂詩話卷第二

趙興毓 威伯集

太宗命蘇易簡講文中子有楊素遺子食經
羨藜含糗之說上因問食品何物最珍
對曰物無定味適口者珍臣止知羹汁為
美臣憶一夕寒甚擁爐痛飲夜半吻噪中
庭月明殘雪中覆一盞盞引缶連沃臣此
時自謂上界仙厨鸞脯鳳腊殆恐不及屢
欲作冰壺先生傳紀之而未暇也 上笑

而然之陳簡齋食蔬詩云冰壺先生當立
傳木奴魚婢何足錄陸務觀亦云彭再彭頭主
簿方用事冰壺先生來解圍魚婢字出古
今註江東謂青魚為婢

高皇棄天下金人來為弔祭禮丞相京公鏜
以檢正假儀曹充長使報謝至近境聞燕
以樂公以過音辭且云若不撤樂有死無
貳論辨數十虜人為屈留汴俟命時有詩
云鼎湖龍馭去無蹤三遣行人意則同凶
禮強更為吉禮夷風終未變華風設令耳
與笙鏞末祇願身糜鼎鑊中已辨滯留期
得請不辭築館便江東既旋

壽皇有執禮可嘉之褒除權工部侍郎

孫君孛升云昔與杜挺之梅聖俞同舟溯汴
見聖俞吟詩日成一篇衆莫能和因密伺
聖俞如何作詩蓋寢食遊觀未嘗不吟諷
思索也時時於座上忽引出奮筆書一小
紙於篋袋內同舟人竊取觀之皆詩句也

或半聯或一字他日作詩有可用者入之
有云作詩無古今惟造平淡難乃笥袋中
所書也

康輿之在

高宗朝以詩章應制輿左璫狎適 虞思
歿有

徽祖御畫特為卓絕 上時持玩以起羨
璫之悲璫下直竊携至家而康適來留之
飲因出示之康繚璫入取殺核輒書一絕

于上曰玉輦宸遊事已空尚餘奎藻繪春
風年年花鳥無窮恨盡在蒼梧夕照中璫
見之大駭然無可柰何明日伺間扣頭請
死 上大怒亟取視之 天威頓霽但一
慟而已

生通青海求龍種死諱文成食馬肝此楊文
公詠武帝詩漢書武帝既誅文成惜其方
不盡膠東藥大輿文成同師因樂成侯求
見帝說大曰臣恐效文成則方士皆掩口

烏敢言方哉 上曰文成食馬肝死耳按
洞冥記云元鼎五年鄧支國貢馬肝石半
青半黑如馬肝春以丸轉之丹用拭髮白
者皆黑帝坐群臣於甘泉有白髮者賜拭
皆黑酷烈不雜丹砂不可近髮齊人李少
翁以神仙惑帝帝乃以馬肝石和丸轉神
明丸賜少翁少翁死即文成也今人見景
帝有食肉不食馬肝未為不知味之語遂謂
文成食馬肝而死非也

歐陽文忠公詩云山浦轉帆迷向背夜江看
斗辨東西東坡亦云山水照人迷向背只
尋孤塔認西東身游山水間果有茲理若
二公善於形容者矣

文康王公晦叔諱署嘗宰定海縣賦回峯院
云山勢欲壓海禪高向此開魚龍腥不到
日月影先來樹色秋擎出鍾聲浪答回何
期隨吏役暫得拂塵埃商逸卿得遺墨刻
之

王元之清明絕句云無花無酒過清明興味
蕭然似野僧昨日隣家乞新火曉窓分與
讀書燈李方叔云千株蜜炬出嚴闈走馬
天街賜近臣我亦茅簷自鑽燧煨針燒艾
檢銅人二詩善述冷淡滋味謾筆之

王荆公有繅成白雪桑重綠割盡黃雲稻正
青之句古今傳誦宗人紫芝送謝耘遊淮
詩云柘空淮爾白梅近楚秧青其規模倣
此

周益公休致白石黃景說賀以古風云相公
能辭一品官不能辭他九轉丹相公能却
萬鍾粟不能却他長生錄潭潭之居移氣
體新年七十兒童似朝朝見客步如飛窓
下時時看細字高車得似垂車榮魏冠何
如掛冠清深衣獨樂真天人誰其友之聊
與彭

環溪吳沈觀穫稻詩云新月輝輝動黃雲漸
漸收形容甚工

芝田錄云鑰必以魚者取其不瞑目守夜之
義王荆公詩云開厨發篋鳴鎖魚山谷詩
云時送一鷓開鎖魚

南史齊高帝賜明僧紹云竹根如意筍籜冠
隱者榮唐李泌隱衡山嘗取松膠枝以茹
之曰養和陸放翁詩云天矯竹如意鱗皴
松養和

台州唐處士蕃有詩云絕頂新秋生夜涼鶴
飛松露滴衣裳前峯月照半江白僧在翠

微開竹序

孟子言舜封象於有庠今道永之間有臯亭
蓋字訛也正在瀟水之上舟楫往來其下
客有題詩云如今不似當時傲日日江頭
送客舟

陸龜蒙詩云他年欲事先生去十賚須加陸
逸冲注逸冲常事陶隱君錫名栖靜處士
十賚猶人間九錫也秦少游遊仙祠一絕
亦用此事詩云本是廬山種杏人出山來

事碧雲君上清欲問因何到請看仙家十
賚文

僧島雲過盱江麻姑山題一絕云萬壘峯巒
入太清麻姑曾此會方平一從燕罷歸何
處寶殿瑤臺空月明此詩一字先作自字
後於同輩云詩固清矣自字未穩當作一
字雲服其言暨再入山已為人改作一字
亦可謂一字師矣
明妃曲古今作者多矣近世徐思叔得之所

賦一篇亦為時人贈矣其詞云妾生豈願
為胡婦失信寧當累明主已傷畫史忍欺
君莫使君王更欺虜琵琶却解將心語一
曲纔終恨何數朦朧胡霧染宮花淚眼橫
波時自雨專房莫倚黃金賂多少專房棄
如土寧從別去得深嘆一步思君一回顧
胡山不隔思歸路只把琵琶寫辛苦君不
見有言不食古高辛生女無嫌嫁盤瓠高
辛事見後漢書

柴與之中行嘉定間仕於朝與時宰議論不合出守章貢危逢吉楨以詩送之云力為君王乞得州補天未了石還收人才自繫國輕重吾道亦閑公去留殿角才辭槐影日船頭便轉荻花秋競誇祖帳都門外誰識眉攢杜甫愁

裴元暈萬頃豫章人性恬退不樂仕進以薦者召為司直在朝嘗賦歸興詩云新築書堂壁未乾馬蹄催我上長安兒時祇道為

官好老去方知行路難千里閑山千里念一番風雨一番寒何如靜坐茅齋下翠竹蒼松子細看遂乞歸

嚴子陵釣臺題詠尚矣天台戴適之復題一絕云萬事無心一竹竿三公不換此江山平生誤識劉文叔惹起虛名滿世間亦新意可喜

唐劉言史觀繩伎一篇末聯云坐中還有沾巾者曾見先皇初教時蓋謂元宗遺樂近

時高九萬賦觀 思陵御製墨本絕句正
用此意詩云淡黃越紙打殘碑盡是
先皇御製詩白髮內人和淚看為曾親見
寫詩時

麻姑山瀑布泉兩派而下灌溉甚博豐城孫
南叟伯溫為南城簿嘗遊賦古風云九閔
守不嚴失却兩玉龍塵世看不得忽來此
山中雷霆白晝間冰雪詩人冒天公不汝
尤為人作年豈甚有江西體

道士黃居萬瀑布一絕云龍梭織處人難見
地軸舒來尺莫量定是水仙工性巧逐時
裁去補滄浪亦有形容之工

予曾祖伯琳官止右選平生喜為詩詠嘗賦
五月菊有為嫌陶令醉來伴屈原醒之句
人所傳誦

頃傳龜峯絕句不知誰氏作亦有思致詩云
大禹胼胝決九州百川無復恣橫流介蟲
不覺鴻波落落黠在高峯頂上頭

慶元間韓侂胄用事貶趙忠定公于永州舟
次衡陽泊右鄣一夕而死教器之陶孫時
處士庠以詩哭之曰左手旋乾右轉坤群
公相翁動流言狼胡無地歸姬旦魚腹終
天痛屈原一死固知公所欠孤忠賴有史
常存九原若遇韓忠獻休說渠家末代孫
客有誦禽言二詩句意俱工惜忘名氏子規
云剛道故鄉如許好其如遊子不歸何自
從五柳先生死空染千山血淚多着新脫

故云替蠅蝻方成四月初烏能早計巧相呼
誰知機杼聲絕息已有王官來索租

廬陵歐陽伯威缺少與周益公同場屋連戰
不利遂篤意於詩誠齋嘗摘其警句抄之
如西風五更雨南鴈數行書詩成夔子國
人在仲宣樓細雨雙飛鷺寒簑獨釣船夢
回千里外燈轉一窓深誰知花過半終與
酒相尋故人驚會面新恨說從頭天上張
公子雲間陸士龍月白玄猿哭更殘絡繹

悲語離遠如許話舊復何時
巷南巷北人招飲一雨一晴
花耐看有客過門湖海士
隔籬呼酒咄嗟問夢回金馬
玉堂上文在冰甌雪椀中青
山如故情非故芳草喚愁
詩遣愁擾擾征人相顧語
蕭蕭落木不勝秋風色似傳
花信到夕陽微放柳梢晴千
里歸來人事改十年猶幸此
身存其絕句四首戀樹殘紅
濕不飛楊花雪落水生衣
年來百念成灰冷無語送春
春自歸桑麻得雨更青葱
芍藥留春結晚紅恠得鳥聲
如許好此身還在亂山中
為憐桃杏亞枝斜看到斜陽
送亂鴉又是一春窮不死天
教留眼看鶯花蓬窓踈踈雨
却似芭蕉夜半聲烟浪蔽天
天倚蓋略容一點白鷗明又
題瑞州飛霞山云野猿來往
嘯明月山鳥兩三題曉風誠
齋嘗稱之

王從周鎬吉之永豐豆人仕至忠州守喜為詩
亦有警句早行云蒞疎和月漱髮爽帶風

梳寓樓觀橋云避宣誰厭雨宜睡不思茶
將雨云雲為催詩黑風仍作誦清望嶽云
未知真是嶽祇見半為雲望仙樓云只言
弱水蓬萊遠無柰仙風道骨何壽趙抃云
仁心廣大麟難比壽骨清竒鶴不如紹師
覓詩云凍雪寒梅雙屐蠟登江明月一竿
絲送潘文叔云催租吏擾潘邠老付麥誰
憐石曼卿出春陵云山色兩間供步障松
陰半畝當郵亭上何尚書云籍通上界神
仙府身現甘泉侍從臣移竹後雨絕句洗
紅窈窕烏區雨落紫颼颼皂角風掛起北
窓聊問訊新移來竹定醒鬆

陶弘景隱居華山梁高祖問曰山中何所有
弘景以詩答曰山中何所有嶺上多白雲
祇能自怡悅不堪持寄君陳簡齋嘗傲之
云石壚深炷火撩亂一榻書只可自怡悅
不堪寄張扶

列仙傳費長房遇壺翁有神術能縮地脉十

里聚在目前放之如初岑參詩云帝鄉北
近日瀘口南連變何當遇長房縮地到京
關又云惟求縮却地鄉路莫教賒王建詩
云安得縮地經忽使我在傍蓋取諸此

娛書堂詩話卷第二

國家圖書館, NATIONAL CENTRAL LIBRARY, TAIWAN, R.O.C.



娛書堂詩話卷第三

趙與虜 威伯集

元城劉忠定公詠八月十四夜月云萬古照
臨終忌滿一輪明徹豈須圓瓊栢云同志
不渝均管鮑清風特立若夷齊撲滿子云
多求惟恐心難滿撲破方知器易盈皆寓
風厲可警又寓興云一紀光陰若擲梭忍
將得喪累天和聖賢自古成功少忠信從
來獲罪多孟子寧尤臧氏沮匡人其柰仲

尼何賈生年少非知道猶更為文市汨羅
猶有忠厚氣象

漫叟云詹存中默禱雨詩云下僚竊有隨車
喜遙見枝頭少女風陸農師稱之管輅別
傳曰輅為清河太守時天旱輅曰今夕當
時雨樹中又有少女微風又有陰鳥和鳴
又少男風起象鳥亂翔其應至矣須臾風
雲聿興玄氣四合大雨傾注梁劉武威詩
云雷舒長男氣枝搖少女風所對七的疎
寮高續古云易曰艮三索而得男故謂之
少男兌三索而得女故謂之少女又曰兌
為少女

誠齋序順菴劉良佐詩稿云夫詩何為者也
曰尚其詞而已矣曰善詩者去詞然則尚
其意而已矣曰善詩者去意然則去詞去
意則詩安在乎曰去詞去意而詩有在矣
然則詩果焉在曰嘗食夫飴與茶乎人孰
不嗜夫飴也初而甘卒而酸至於茶也人

病其苦也然苦未既而不勝其甘詩亦如是而已矣昔者暴公譴蘇公而蘇公刺之今求其詩無刺之之詞亦不見刺之之意也乃曰二人從行誰為此禍使暴公聞之未嘗指我也然非我其誰哉外不敢而其中愧死矣三百篇之後此味絕矣惟晚唐諸子差近之寄邊衣云寄到玉關應萬里戍人猶在玉關西弔戰場云可憐無定河邊骨猶是春閨夢裏人折楊柳云羌笛何須怨楊柳春風不度玉門關三百篇之遺味黯然而猶在近世惟半山老人得之予不足以知之也予豈敢言哉先生此序深得作詩之宗旨故錄之

劉良佐應時四明人平生用力為詩見稱於范石湖誠齋亦喜其寂寞黃昏愁弔影虛窓怕上短檠燈睡魔正與詩魔戰窓外一聲婆餅焦之句陸放翁跋其集云如頗識造物意長容我輩閑日晏猶更睡犬鳴知

有人世事不復問舊書時一看一夜催花
雨數家臨水村青山空解供眼界濁酒不
能澆別愁覓句忍飢貧亦樂抄書得趣老
何傷雖前輩以詩鳴者何以加焉

杜牧之云千首詩輕萬戶侯鄭谷云得句勝
於得好官詞意竒甚東坡云萬戶終輕千
首詩反杜意也陳簡齋亦用鄭語云書生
得句勝得官

錢文僖無題詩云春瘦已寬連理帶夜長唯
有辟寒金按王子年拾遺記魏明帝時昆
明國貢嗽金鳥常吐金屑如粟鳥性畏寒
處之小室內外通光名辟寒臺宮人以鳥
吐金飾釵謂之辟寒金余謂辟字當作畏
避之辟音去聲若作辟除之義入聲讀之
則非以畏寒得名不能以禦寒也文僖詩
意恐誤作入聲用之故識此更俟識者訂
之

守法度曰詩載始末曰引體如行書曰行放

情曰歌蕪之曰歌行悲如蛩蟄曰吟通乎
流俗曰謠委曲盡情曰曲此姜堯章語於
詩說見之

梅和勝執禮未第時家極貧雪中以詩謁邑
宰云有令可於難閉戶無人堪訪懶移舟
近世劉改之詠雪詩云功名有分平吳易
貧賤無交訪戴難句法亦相似

徐靈因送趙天樂赴高安幕詩云溪來城下
綠山到市邊平翁靈舒高安張錄事可詩

云山上仙蹤丹井在郭中溪色市橋分二
詩善狀高安之景漫錄之

海棠風韻嫣然於衆卉間騷人墨客吟咏固
多矣至僧惠法之叔彭淵材乃以無香為
恨世人未以為然陸放翁絕句云蜀地名
花擅古今一枝豈可壓千林幾彈更到無
香處常恨人言太刻深蓋為海棠解嘲亦
有深意

陸放翁云參寥詩初程莫早發且宿灞橋頭

語意至工故公宿北巖院云連馬紛紛送
入朝北巖燈火夜無聊中年到處難為別
也似初程發灞橋

唐人汴河詩云煬帝功成只此河至今千里
賴通波若無錦纜龍舟事共禹論功不較
多此詩兼具美刺之體

周益公兄秉成居士周子中生於乙巳益公
丙午誠齋了未郡人劉訥敏叔寫為三老
圖益公題詩云同辭宦路返鄉閭兩驕驩

中間以馭前後顧瞻羞倚玉支干引從偶
連珠二人不必邀明月九老何妨續畫圖
從漢二疎唐尹後相親相近此應無誠齋
題二絕云旦爽行間着李真黃冠不合附
青雲二南風裏君知麼添箇委蛇退食人
劉郎寫照妙通神三老圖成又一新只道
老韓同傳好被人指點也愁人益公形容
甚工誠齋謙遜自處真一時盛事云

陸象山少時作詩云從來膽大曾膈寬虎豹

億萬虬龍千從頭收拾一口吞有時此筆
未安帖哮吼大嚼無毫今朝飲渤海水暮
宿崑崙巔連山為之琴長河為之絃萬古
不傳音吾當為君宣

豫章鄒應可少有詩名誠齋誌其墓曰其詩
句法自徐師川上溯魯直以趨少陵戶牖
嘗過杜工部祠賦詩云疇昔吟詩憶來陵
茲因捧檄過祠堂一生忠義孤懷裏千載
淒涼古道傍自是風霜侵病骨非干牛酒

泥愁腸明朝解纜秋江上問訊先生一瓣
香次韻友人廬山云十年馬足謾問閑脚
底廬山未往還憑誰說與陶夫子山不負
予予負山

雲谷雜紀云前輩詠夷齊多矣獨石延年有
一聯云耻生湯武干戈日寧死唐虞揖讓
區蓋夷齊在孟津諫伐紂而死於首陽首
陽在河中有永樂縣河中即古蒲坂舜之
所都也

廬陵劉叔儼仙倫詩才豪甚但傷太露有題
岳陽樓一篇為人傳誦詩云八月書空鴈
字聯岳陽樓上俯晴川水聲軒帝釣天樂
山色玉皇香案烟大舶駕風來島外孤雲
啣日落吟邊東南無此登臨地遣我飄飄

意欲仙

魏仲先野為詩冲淡閑逸有警句前輩稱之
甚多上陳使君云憂民如有病見客似無
官形容甚切余喜誦之

呂紫微詩話云饒德操初見潘邠老和黃山
谷中興碑詩讀至天下寧知再有唐皇帝
紫袍迎上皇嘆曰潘十後來做詩直至此
地位耶余閱潘詩全篇誠可巫山谷所作
詩云公泛浯溪春水船繫帆啼鳥春崖邊
次山作頌今幾年當時治亂春風前明皇
聰明真脫謬乾坤付與奴哥手骨肉何傷
九廟焚蜀山騎驢不回首天下寧知再有
唐皇帝紫袍迎上皇神器倉忙吾敢惜兒

不終孝聽五郎父子幾何不豺虎君臣寧
能責胡虜南內淒涼誰得知人間家事作
端午平生不識顏真卿去年不答高將軍
老來讀碑淚橫臆公詩與碑當共行不賞
邊功寧有許不殺奉春猶敢語兩潛日矣
字未訛千秋萬歲所鑒多

杜牧之詩云鷄犬圖書共一船冠國寶云人
語雜聲共一丘蓋用此句法

李參預璧云使燕時伴使李著能誦荆公草

頭蛺蝶黃花晚菱角蜻蜓翠蔓深之句以
為妙此乃荆公斜徑絕句後聯形狀景物
語意精工虜亦知詩者矣

唐人中秋月詩劉得仁云一年惟一夕長恐
有雲生張祐云一年逢好夜萬里見明時
司空圖云此夜如無月一年空過秋俱用
一年字獨本朝王黃州云莫辭終夕看動
是隔年期用隔年字意味尤長殆非三子
可及

徐師川偶成云茅茨雅稱踈籬見密仍於碧
水亘細落李花閑自數偶行芳草步因遲
徐自注云王荆公暮年絕句之妙傳天下
者細數落花因坐久緩尋芳草得歸遲之
句老夫此詩偶似之耶竊取之耶善作詩
者不可不辨子欲師川雖規倣荆公終覺
不及識者當自知之

陸放翁不如茅屋底四章其一鑄印大如斗
佩劍長拄頤不如茅屋底睡到日高時其
二南伐踰銅柱西征出玉關不如茅屋底
高枕看青山其三綺席堆盤起珊瑚列庫
藏不如茅屋底父子自耕桑其四列鼎賓
筵盛籠坊從騎都不如茅屋底醉倒喚人
扶此公晚年一丘一壑遊戲翰墨之場高
蹈之風尚可想見也耶

蘋桐花前輩少詠竹溪雷公孝友曾賦云繁
粲朱英葉似桐薰風披拂到西風迎秋送
夏常相見誰道花無十日紅些葉遠大於

此詩見之矣

錢塘下天竺寺石門澗中有卧龍石慈雲法師有詩云梅有和羹日龍無為雨心以其石生梅也

南康人家有亭占山水之勝取山谷詩以天開圖書扁名有詠者云須知造化安排巧不費丹青點畫工隱然意在

浙僧融書記為詩有警句如云試茗知泉味看花省藥名御嘗愛梅云調鼎和羹知

有在聖輿不為暗香來僧中傳誦梅者蓋曾經車駕賞幸云

武允蹈李德由高安人連蹇塲屋刻意於詩日鍛月鍊時出新句如露萱鉗宿蝶風木撼鳴鳩屋頭風過鴈燈背月移窓霜林五色錦烟渡一縈絲午簾風供睡課夜窓烏雨辨詩通眼昏書字不着紙耳重聽言常問人皆驚異可誦雷竹溪作序歸之

居鄉如處子居官如戰士處子常畏人戰士

惟有死兒曹書諸紳勿謂卑平耳此白石
菑巖老詩可謂至言矣

唐人常鵬翼絕句誰肯閑尋幽徑竹却嫌絲
管好蛙聲自從煮鶴燒琴後背却青山卧
月明所謂殺風景之甚者

曾文清云山谷以竹夫人為竹奴余以脚
婆為錫奴戲作一絕云露帳桃笙晝寢餘
此君那可一朝無秋來冷落同班扇歲晚
溫柔是錫奴

海昌真如寺般若臺張橫浦名之臺上有郭
熙畫山水寺有井曰靈泉公有詩云高僧
超物外有戶畫常高海濶知天大泉甘識
地靈一簾春月靜半點越山青便作歸興
計移文休勒銘

宗人紫芝贈李道人云教人知道遁甲笑客問
勾庚前人所未對亦警句也

娛書堂詩話卷第二

國家圖書館, NATIONAL CENTRAL LIBRARY, TAIWAN, R.O.C.



娛書堂詩話卷第四

趙與麤 威伯集

栢生如拳栢盈把同時移根種庭下栢生未
活栢已榮春風飛飛意融冶青條眼看十
餘尺踈陰朦朧反蔽栢栢底若羞不自奮
傍人來觀為栢惜飛霜漸久時筮而遷秀色
不復如舊年折幹枯條委爨下栢生無礙
自參天此詩是劉敞先生所賦種栢筮篇詞
近而昔遠直有味之言也

黃山谷治平三年赴鄉舉詩以野無遺賢命
題主文衡者廬陵李詢讀詩中兩句云渭
水空藏月傳巖深鎖烟擊節稱賞以為此
人異日當以詩名擅四海遂膺首選持衡
留藻鑑李公之謂乎

張文潛讀中興頌云萬里君王蜀中老及虞
美草行玉帳佳人坐中老二句之工在一
老字

白樂天詩云倦倚綉床愁不動緩垂綠帶鬢
鬟低遼陽春盡無消息夜合花前日又西
好事者畫之為倦綉圖

詩中用事以倒翻古人公案為奇陸放翁尤
多此格如云君看赤壁終塵迹生子何須
似仲謀太平事業人皆見不封倫死與
生少游細看猶多事何用人間下澤車絕
句觀雪剡溪天下勝題詩常恨不能奇未
應便許微之語此興何曾有盟時

杜詩漆有用而割膏以明自煎黃山谷云龜

以靈故焦雉以文自翳蓋取漢書兩龔傳
薰以香自燒膏以明自消之語

山谷云石吾甚愛之莫遣牛礪角牛礪角尚
可牛鬪殘我竹語甚軀竒李太白獨漉篇
云獨漉水中泥水濁不見月不見月尚可
水深行人沒山谷句法抑恐有取乎此
杜牧之云此信的應中路得亂山何處折書
看予嘗如京中途得家問時立馬亂山
間方思是句之為工

吳仲權鎡絕句云子猷君竹竹卿卿車騎幕
中塵不清不是淵明真愛菊菊花冷淡似
淵明張子湖極加賞嘆

叅政任希夷賦雪詩云人間草木皆瑤樹天
下樓臺盡玉壺雖非林示物體然甚有凌雲
之氣也

表元量初筮樂平印曹與野處洪公詩篇往
來公每稍許元量嘗有雲歸青嶂雨初歇
花卧碧苔春已休之句公尤嘆

誠齋為江東常平使者行部禁內一客獻詩
誠齋極喜詩云江東使者行部時信船一
隻艣兩枝不知夜來春雨過艇系在誰家門
外籬我欲從人問消息箇樣船多無處覓
就中一事最堪稱隔船聽得讀書聲耳

詩有以法家吏文語為對如東坡云避諂詩
尋寸醫畏病酒入務 先子亦有云架閣酒
無債編脩詩末工

陸放翁小築云雖非隱士子午谷寧愧詩人

丁卯橋對偶極親切杜少陵贈元逸人歌
云故人今居子午谷獨在陰崖結茅屋王
莽傳莽以皇后有子孫瑞通子午谷道從
杜陵直絕南山徑漢中師古曰今京城直
南山有谷通梁漢道名子午谷唐許渾有
丁卯集丁卯乃潤州城南橋名渾居橋北
謂之丁卯莊故址尚在

劉槃青州人富韓公守青時遇之甚厚能詩
有西軒忽見好溪山一丈閑愁減二尺之

句為人所傳陸放翁得趙川書云儲淡一聲
聲世事減愁三尺者君書疑用既語

東風料峭作春寒吹盡汀花客未還白水渡
頭烟雨暗竹林猶隔嶺南山此詩僧自益
絕句題於長樂縣秀峰寺壁間姚令威廣
其詩云陰陰古壁暮生寒底是詩人去未
還海濶雲深無處問子規啼斷月中山

清源石廣字聲叔能詩有云山盡疑無路雞
鳴却有村王荆公稱獎之用為法寺數年

得監司

徐淵子似道亭泰和日嘗謁誠齋執贄以詩云
昨日離山谷今朝謁子雲烟霞俱獻狀草
木亦能文投刺真成贅哦詩不當芹匆匆
拜床下此意欠三薰公即席和云夜對三
更月朝揮五朵雲葛藤前輩話衣鉢古人
文濁酒惟山果藜羹趁水芹看承無一物
清絕炷爐薰今誠齋集遺此詩

晚唐詩人最盛其集遺逸者尤多御史黃瑄

推官李咸用皆晚唐詩人而集不顯誠齋
嘗得其本序之黃滔聞新鴈云一聲初觸
夢半白已侵頭餘燈依古壁片月下滄洲
遊東林寺云寺寒三伏雨松偃數朝枝上
李補闕云諫草封山藥朝衣施衲僧退居
云青山寒帶雨古木夜啼猿李咸用如見
後猶無語別來常獨愁孤城三面水古木
一邊春月明千嶠雪灘急五更風燈殘偏
有焰雪甚却無聲雲蔽山色晴還媚風約

溪聲靜又迴未醉已知醒後憶欲開先為
落時愁皆誠齋序中所摘佳句也

黃亞夫山谷先生之父也所居脩水上其傍
東山寺公有絕句題石云竹風松月牢於
鎖閉閉人心物外情燕雀間經俱已慣歸
來不怕讀書聲

誠齋云年少作千餘篇至紹興壬午皆焚之
大槩皆江西體今所存江湖集者蓋學后
山半山及唐人也嘗舉以舊詩數聯於尤

延之如露窠蛛結網風語燕懷春立岸風
大壯還舟燈小明疎星煜煜沙貫石綠雲
擾擾水浮苔坐忘日月三杯酒卧護江湖
一釣船延之慨然曰焚之可惜余亦無甚
悔也

韓昌黎和裴晉公詩云旗穿曉日雲霞雜山
倚秋空劍戟明洪慶善云一士人謂以我
之旗况彼雲霞以彼之山况我劍戟詩家
謂回鸞舞鳳格按古樂府有雲屯兩陣合

劍聚七星明謂雲不對星而對劍劍不對
陣而對雲謂之至對

牡丹篇詠至唐人始盛如李正封羅鄴之句
尤膾炙人口白樂天有隱葉多情隱羞面
含叢無力含醉粧亦佳句也

卻掃篇云陳叅政去非學詩於崔德符嘗請
問作詩之要崔曰凡作詩大要工拙所去
忌俗而已天下書雖不可不讀然不可有
意於用是去非亦嘗與人言本朝之詩

有慎不可讀者有不可不讀者慎不可讀者梅聖俞是也不可不讀者陳無己是也白樂天云周公恐懼流言日王莽謙恭未篡時若使當時身便死一生真偽有誰知此詩乃二十八字史論

誠齋云或問何謂雙聲疊韻曰行穿詰曲崎嶇路又聽鈞鞞格磔聲上句疊韻下句雙聲也何謂蜂腰鶴膝曰詞源倒流三峽水筆陣獨掃千人軍無邊落木蕭蕭下不盡

長江滾滾來前一聯蜂腰後一聯鶴膝也零陵一野寺山谷親筆一詩云春將國艷薰花骨日借黃金縷水紋將借二字甚工誠齋詠木犀亦云天將秋氣散寒馥月借金波滴小明黃山谷狀二事誠齋狀一事尤得奪胎法

諫議宋文淵齊愈宮詞云禁城春水碧溶溶流出桃花萬片紅葉上細看無一字始知無女怨春風較唐人所作又出一頭地也

真西山嘉定間以論邊事與特相不合出知
泉南家仲本橫餞以古風云班行朝遣白
羽書江頭夜鳴青竹輿海邊太守歸闕客
底事何用驚皇都北門揮掃窓雲霧南國
驅馳樹風雨秋深羽扇擲天外水滿桔槔
賤如土長淮中斷天悠悠卧龍不起令人
愁橐駝滿都塵不休盜賊失喜蒼生慊中
興人物自人物黃鵠高飛白鷗沒萬里相
思百里別明年與公共秋月仲本又題釣

臺詩云掉臂辭漢爵公乎豈不情為嫌張
禹佞故學伯夷清大節群公倡高風百世
傾阿瞞窺鼎意終老愧先生皆膾炙於人
口仲本方駸駸要路立朝大節即必可觀矣
張約齋鑑循王之孫游意風雅與誠齋放翁
唱和詩多佳句晚晴云楊花飛盡艾荷香
鷺事方休燕乳忙天色賺人無處會曉晴
晝雨晚斜陽又云遊人何處是涯醉倒乘
風卧酒家滿面落人敲不醒夢魂窓意入

南華題六合寺云古剎藏幽勝深林一徑
寬樓高鐘韻遠竹密日陰寒花認香邊折
山冝雨後看耽詩眠不得清興寄毫端
齊人謂相許為掉磬姚令威次許志仁韻云
詩社得公能掉磬墻東知有隱君翁

豫章李公大異持節日過山谷墓賦二詩云
曾從史館侍虛皇千載文宗日月光今日
青青原上草依稀猶帶六經香百年文物
豫章公喬木陰陰祗晚風楚北屢吟招不
得紫雲扶在玉樓中

傳自得云予嘗以作詩之要扣常齋先生朱
公松時積雨初霽西風淒然公因舉簡齋
開門知有雨老樹半身濕及常蘇州諸生
時列坐共愛風滿林之句且言古之詩人
責衝口直致蓋與彭澤把菊東籬下悠然
見南山同一閑揆三人者出處窮達雖不
同誦此句則可見其人之蕭散清逸予時
心開神會始知為詩之趣傳作常齋集序

遂述其語

常德寇公泉蓋公南遷時過之題曰寇平仲
酌泉煮茗回望北闕黯然而行繼而丁謂
南遷亦過之題曰丁謂之烹茶禮佛而行
張南軒觀之曰寇公不忘君丁公為已而
已因題詩曰酌泉精爽凜如在拜佛低頭
有厚顏用舍可知當日事忠邪難掩片言
問

西溪姚令威究博物洽聞尤工於詩集中多

警句春暮云淡香花濕雨薄影絮行風用
昌黎雪詩云舞鏡鸞窺沼行天馬渡橋句
法懷歸云客心春鴈急詩思暮江寬夜雨
云春潮生蛤暈夜雨長蝸涎遣懷云日暮
燕爭戶風漂花入簾惜春絕句云游絲繫
日春無跡飛絮穿簾雪不寒惟有閑雲輕
映日留陰特地惜花殘此數詩皆前人所
未道也

蘇穎濱云李太白詩過人其平生所享如浮

花浪蕙其詩云羅幃卷舒似有人開明月
直入無心可猜不可及

豫章揭紀雄登進士第未唱名而卒樞密劉
仲洪吊以詩云黃金榜在人何在白玉樓
成記未成

竹坡黃伯庸疇老老翁謠曰白頭老翁髮垂
領牽孫與客摩孫頂翁年八十死無恤憐
汝孩童困饑饉去年雖旱猶半熟今年飛
霜先殺菽去年雖飢猶一粥今年甕盎無

餘粟客謝主人將求去淚下如糜不能語
伶仃老病惟一身獨坐茅簷夜深雨夢回
猶自誤呼孫縣吏催租正打門深得諷刺
之體因錄之



娛書堂詩話卷第四終

國家圖書館, NATIONAL CENTRAL LIBRARY, TAIWAN, R.O.C.



共四札八卷

